

BOGHES DE 'ENTU

Su 'entu 'ettat boghes ispramadas,
abboghinat su 'entu in sos montijos;
murrunzat canu e abbolottadu
subra 'e sas ranchidas pedrajas
mentras a palas de su cuccuru desertu
un'attera die si che falat frittida.
Ahi bentu 'e sa pena!
Su sole istraccu e atturdidu
si ch'est fuidu moribundu
affacca 'e sa serra pidiga
fra bisos e ispèras traighidas
chi pelèan de ruinzu su coro e su chelveddu.
Sa punta de Santa Vittoria insambentida
carignat attesu una luna ispantada
a caddu de nues minettosas.
Si cagliat muda sa 'idda de 'iddia
e su mudòre ingroghidu
percurrent infaustu sas istradas.
Su toccu 'e mele de una Ave Maria
lenit caente e lezeri
sas umbrosas piàes de su coro
e sa mirada grae e vagabunda
bandat a sa tanca ispoza
inùe non b'hat giogu 'e pizzinneddos;
ei sas primas umbras lòrinas de sa notte
imboligan su ciparissu attetterigadu
cun mùrinos annunzios de morte.
Ahi bentu 'e sa pena!
Cando, nara cando hat a torrare
nuscosu e solianu su 'eranu?
Sutta 'e sa repentina temporada
recuit frazigada un'ama a su cuile
e unu muttu 'e peléu istraccu
segat s'aèra buluzada de sas istutturradas.
Ahi bentu 'e sa pena!
In Muntanuddu una 'oghe istràmada
si pesat segada 'e secretu piantu
attittende su mortu insambenadu